



Kamis, 28 Desember 2023
Ogen: 1 Samuel 2: 18-21



*Mupus anak dilaki-anak
diberu*



Tiap jabu i bas kalak Karo merincuh kal guna ndatken anak sebage ulih ntahe buah i bas perjabunna. I bas kerja perjabun megati kal si begi toto ras arapen i bas sangkep geluh nari: "jumpa bulan ras matawari "(jumpa anak dilaki ras anak diberu) ntahe "jumpa si nangkih mayang ras si nutu cimpa". Bagenda pentingna anak enda maka bas bertin nari denga pe nggo ibahan sada acara man bana eme adi enggo 7 bulan bas bertin ibahan acara mesur-mesuri/maba manuk mbur. Kenca enggo tubuh anak enda ibahan ka acara petelayoken (maba anak ku lau), erbahan gelar, ngelegi bayang-bayang, pejuma-jumaken/petiga-tigaken, ergunting buk. Bagem pentingna anak ipehaga mulai kitik-kitikna nari. Tentu ibabo sie kerina maka anak si nggo ibereken Tuhan man banta tetap nge arus siendesken ka man Tuhan. Maka adi nggo seh paksana bagi siniaturken gereja guna ngaloken peridin kitik maka ibabalah ia ku gereja. Bage pe adi nggo ia reh galangna makai baba me ia ku sekolah Minggu.

Hana enggo ngendesken anakna Samuel man Tuhan. Maka ia jadi sikerajangen Tuhan ras tading ibas Rumah Tuhan janah denggo jadi sierdahin Tuhan ras hakim guna bangsa Israel. Tapi kepeken kai siilakoken Hana enda ndatken pasu-pasu ibas Tuhan nari arah imam Eli. Maka denggo Hana mupus anak dilaki ras anak diberu.

Adi nggo sialoken pemere Tuhan si mbelinna maka kelengilah pemere Tuhan e, janah babai ia jadi anak si erkemalangen man Tuhan. Adi si lenga pe, tetap tutus ertoto, pasti isehken Tuhan denggo, waktu Tuhan pasti yang terbaik. Si pentingna saber ras megenggeng, periksa kesehaten, jaga diri ras pola hidup ras rakutlah e kerina alu mindo/ertoto man Tuhan.